

## Saksprotokoll i fylkestinget - 12.-13.06.2019

Fylkesordføraren gav slikt svar:

«Regjeringa skal kvart fjerde år leggje fram nasjonale forventningar til regional og kommunal planlegging for å fremje ei berekraftig utvikling i heile landet. Det går fram av plan- og bygningslova § 6-1. Dei nasjonale forventningane skal følgjast opp i arbeidet med planstrategiar og planar i fylkeskommunane og kommunane og ligg til grunn for dei statlege myndigheitene sin medverknad i planlegginga.

I dei nyleg oversendte nasjonale forventningane 2019-2023 går det mellom anna fram at det er forventa at fylkeskommunane og kommunane identifiserer og tek omsyn til viktig naturmangfald, friluftslivsområde, overordna grønstruktur, kulturhistoriske verdiar, kulturmiljø og landskap i planlegginga. Samla verknader blir tekne omsyn til. Regjeringa har konkrete forventningar til planlegging som verktøy for heilskapleg berekraftig utvikling.

Hovudansvaret for arealforvaltninga ligg hos kommunane. Fylkeskommunen har ansvar for planfagleg rådgjeving og er regional planmynde gjennom plan- og bygningslova. Hordaland fylkeskommune tek dette ansvaret på alvor, og gjennomfører ei rekkje arrangement og samlingar der forskjellige tema knytt til planlegging og arealforvaltning vert sett fokus på. Fylkeskommunen vurderer og gir fråsegn til kommunale plansakar, både oppstartsmeldingar, reguleringsplanar og kommuneplanar, og på alle desse nivå er Naturmangfald eit tema som vert vurdert. Fylkeskommunen handsamer kommunale planar utifrå vedtekne regionale planar og sektoransvar. Forvaltningsansvaret for truga artar er imidlertid lagt til Fylkesmannen, medan Fylkeskommunen har forvaltningsansvar for ikkje truga artar og haustbart vilt.

Regional planmyndighet skal minst ein gong i kvar valperiode, og seinast innan eit år etter konstituering, utarbeide ein regional planstrategi i samarbeid med kommunar, statlege organ, organisasjonar og institusjonar som vert berørt av planarbeidet.

Planstrategien skal redegjere for viktige regionale utviklingstrekk og utfordringar, vurdere langsiktige utviklingsmoglegheiter og ta stilling til langsiktige utviklingsmål og kva spørsmål som skal takast opp gjennom vidare regional planlegging.

Den regionale planstrategien skal innehalde ein oversikt over korleis dei prioriterte planoppgåvene skal verte fulgt opp og opplegget for medverknad i planarbeidet.

I tillegg kan regional planmynde starte arbeid med planer etter plan og bygningslova på områder der staten, regional planmynde og kommunane saman har ansvar for å løyse planoppgåver av regional eller nasjonal betydning, her under planlegging av større samanhengande natur- og friluftsområde (jf pbl §3.6).

I gjeldande regional planstrategi for Hordaland (2016-2020) er berekraftig regional utvikling definert som eit langsiktig mål, der den samla aktiviteten i Hordaland må ta omsyn til økologisk balanse regionalt og globalt og langsiktig forvaltning av ikkje-fornybare ressursar. Nedbygging eller beslaglegging av areal og forbruk av ikkje-fornybare ressursar er forhold som bør vurderast nøye dersom ein skal oppretthalda ein god miljøtilstand i framtida. Bit-for-bit utbygging, manglande heilskapleg prioritering av arealbruk og kortsiktige disponering av naturressursar er uheldig. Overordna planar for bruk og vern av areal- og naturressursar er heilt avgjerande for ei berekraftig utvikling. Forpliktande regional arealplanlegging med bruk av kart, retningslinjer og bestemmelsar gir forutsigbarheit og meir effektive planprosessar, og må styrkast.

I den regionale planstrategien for Hordaland er det vedtatt at ein skal utarbeide ein regional plan for areal, natur og kulturminneinteresser. Utfordringane og strategiane for ei klima- og miljøvenleg utvikling viser at det er trong for å utvikle ein føreseieleg og samstemt politikk når det gjeld arealforvaltning i form av ein regional plan. Dette vil kunne sikre viktige verdiar gjennom ei langsiktig og målretta forvaltning. Bevaring av eit rikt naturmangfald, og arealstrategiar som vil ivareta artsmangfaldet i det nye fylket vårt, bør vere eit sentralt fokus når ein tek fatt på dette viktige og omfattande planarbeidet. Utarbeiding av eit arealreknskap, som til dømes inkluderer arealendringar, økologisk tilstand og behov for nye kartleggingar, kan vere eit nyttig bidrag i dette arbeidet.»

I samband med interpellasjonen vart det frå interpellanten Marthe Hammer (SV) sett fram slikt forslag til vedtak:

«Hordaland fylkeskommune skal få fortgang i arbeidet med å utvikle metodikk og felles grunnlag for hva som er «den samlede belastning» etter naturmangfoldloven.

Fylkestinget meiner det for Hordaland, og framtidig Vestland, er behov for å utarbeide eit arealregnskap som gir oversikt over arealendringar, kartleggingsbehov og status for økologisk tilstand, behov for restaurering og trender for naturmangfoldet i fylkets kommunar. Som regional planaktør skal fylkeskommunen vere ein viktig premissleverandør i dette arbeidet.»

### **Røysting**

Det var 54 representantar til stades.

Hammer sitt forslag vart samrøystes vedteke.

### **Vedtak**

Hordaland fylkeskommune skal få fortgang i arbeidet med å utvikle metodikk og felles grunnlag for hva som er «den samlede belastning» etter naturmangfoldloven.

Fylkestinget meiner det for Hordaland, og framtidig Vestland, er behov for å utarbeide eit arealregnskap som gir oversikt over arealendringar, kartleggingsbehov og status for økologisk tilstand, behov for restaurering og trender for naturmangfoldet i fylkets kommunar. Som regional planaktør skal fylkeskommunen vere ein viktig premissleverandør i dette arbeidet.